



Necroloc per
Placi Venzin-Deglise
Villeneuve/Rueras

*13-07-1933 + 23-12-2013

Cu hiel dau a Claudi gl'engraziament per Placi, ha el manegiau in necrolog fuss lu schon bien da scriver. «Gie, gie», ei vegniu sco in siet ord mia bucca «quei fetschel lu schon.» Dapi jamnas sundel cun mes patratgs vidlunder. Mo realisar enzatgei... nuot. *Tgei e co, jeu vegnel buca a frida. Sas tgei Placi, jeu scrivel a Ti ina Brev.*

Car Placi,

Naschius eis Ti ils 13-07-1933 a Rueras sco emprem affon dad Ignazi e Theodosia Venzin Deragisch. Bia memia spert has Ti gia fatg da lezzas uras, vegnius sil mund cun 7 meins. Sas tgei paterlem che quei ha dau en Tujetsch: Gie, ei quintavan ils meins che bab e mumma havevan giu nozzas e quei era stau il november 32. Per cletg era docter Huonder serescuduis da quei paterlem e detg: Mei e mirei quella creatira, quel sgola gleiti si enta Parvis. Per mumma ei quei stau in grev temps, dallas gadas che ella ha raquintau a mi detagls da quei eveniment. Tuttavia la nauscha brev da pader Placi Deragisch. Quella brev hiel astgau leger cun 15 onns cu nus fuvan vid lavar ora la stiva. Mumma seseva sin canapè ed jeu hiel stuiu leger dad ault. A mumma ruclavan larmas dalla fatscha giu (a mi seglian ussa era las larmas els egls)! Lu di ella: «Sas Barla, scarpa quella brev e metta ella enta fiug». Jeu hiel fatg quei, ed oz stundel mal che hiel buc pli quei document. Ad el ed a farrer Fetz ha docter Huonder lu scret in brev da declaranza.

Negin che ughediava da far schetg a Ti, temevan ch'ei rumpien l'ossa. La mumma ha inagada detg che Ti fuvies sco in gategl. Per cletg haveva ella l'onda pintga, sco nus numnavan la mumma dils Giossis. Lezza ha tgirau Tei tochen che mumma ha lu pudiu far.

Anna 34 ei Giusep naschius ed anna 38 mia paucadad. Nus treis havein giu ina biala affonza. Jeu seregoldel bugen da quei temps. Ti eras adina il car e bien frar. Cun Tei sail buca seregudar che nus essan sesgargni. Giusep dominava e nus dus schevan reger el.

Dallas suadas che Ti fagevas cu ei fuva dad ira si Clavadi ni Mulinatsch, a far fein. Mumma caminava sco in cavriel, nus dus davos suenter e Tia fatscha digrava dil suadetsch. Ti schevas adina: Il pur fetsch jeu mai! Ils 8 onns da scola has Ti passentau a Rueras. Ti fuvas in premurau scolar ed ei deva mai reclamaziuns dil scolast ni gl'augsegner (quei che fuva buca il cass tier mei e Giusep).

Caluster has Ti lu era fatg e para che tuts eran cuntents cun Tei. Jeu seregordel aunc bein cura che Ti has survegniu in bellezia cudisch da messa da sur Christian Monn. Quel cun fegls fins ed ina cuviarta da curom ch'ins saveva serrar giu cun siara anetga. In tec scuidonza havevel schon sin Tei, perduna.

La stad avon che ir el «lehr» eis staus giu Trun tier ils Tomaschetts sco fu-megl. Il di da perdananza a Trun essan mumma ed jeu stadas envidadas en leu. Quei ei stau la detga fiasta, mo Tei havein nus buca viu. Ti has stuiu star si mises e mumma era tresta e vilada ch'ella ha buc viu Tei. Lu anna 49 eis Ti ius a Langnau a/Albis tier ils Widmmers el «lehr» sco pec patisier. Jeu seregordel aunc bein dils buns cussegls dil tat dallas ondas e quei che Sigisbert ha detg. Na quei emblidel mai. «Teidla Placi sche Ti stos ir l'entschatta a svifar «naschurs», lu fai quei e buca recloma». Jeu hiel lu detg alla mumma. «Quei sa buca constar». Mo lezza ha lu era manegiau che quei sappi schon esser. Bab ha cumpignau Tei a Langnau a/Albis. Cu el ei returnaus ha el raquintau il suandont: Ti hagies stuiu i sin «hisli», sco nus schevan lu, e returnaus da leu hagies Ti scutinau a bab: «Veis viu il «hisli»? Ju crei betga tg'ju stu svifar naschurs, ain tgombra mia sai è betga in «naschier». Il patrun vuleva saver tgei che Ti hagies, e bab ha lu giu ina stgisa. Tgeinina sail buca pli. Jeu sail mo che nus tuts havein ris da bien cor.

3 onns has Ti giu da studegiar e lu has serrau giu cun fetg buns examens. Ussa ha ei giu num encuir piazza. A Luzern eis lu staus tier la familgia Studer. Dacheu naven has Ti mintga meins tarmess raps a casa per sustener la familia. Engrazia Placi. Jeu hiel era profitau da Tei, cu sundel ida 1955 a Cuera ella «Fauenschule». Mintga meins survegnevel ina

bancnota da 5.- frs. Quei fuva per mei ina facultad. 1 franc mettevel d'ina vart per ch'jeu sappi mintga mesjamna ir el Migros a cumprar in joghurt da 25 raps. Quei dessert gudevel lura el parc dil marcau. Il rest da 4 francs fuvan per cumprar fil, guilas e teilas ch'ins duvrava.

Quei hiel mai emblidau. Suenter in onn eis serendius ad Ostermundigen tier la famiglia Immoos. 1954 has Ti procurau per mei ina piazza per gidar en casa. Quei ei stau in bi onn. Cu havevan liber mavan a Berna e sentupavan culs Romontschs. Inagada al meins a Kino. Tgei films che havein viu saiel buca pli.

Tiels Immoos has empriu d'enconuscher l'*Alphonsine*, che fuva leu fumitgasa, e la quala Ti has maridau igl onn 1963 e secasai a Lausanne. Dus affons, Valerie e Cyrille han engrondiu Tia familgia. Igl onn 1967 essas serertratgs a Villeneuve VD e leu fundau ina atgna fatschenta. Ti



La nota da 5 francs d'avon onns



Il Placi duront la lavur
en sia atgna fatschenta

has dau tut per Tia clientella. La damaun dallas 02.00 tochen miezdi en fatschenta, lu entginas uras durmir e puspei en fatschenta. Jeu se-regordel aunc bein cu fuvel sin viseta tier Tei. La damaun dallas 06.00 uras vegnevan ils clients davos en per ils stortins. 1990 ha ei giu num ch'il baghetg nua che la fatschenta seigi, vegni fatgs giu per baghegiar enzatgei niev, in grond hotel e negina pasternaria. Tgei pomai far? Ei han entschiet a far giu il baghetg e Ti has fatg vinavon paun sco adina. In grond artechel ella gasetta ha ludau Tei che Ti eis buca cedius immediata quels gronds speculants. Ils 20-07-1991 eisi stau aschi lunsch e per cletg has Ti survegniu ina plazza nua che Ti has luvrau sur Tia pensiun ora tochen il december 2013.

Ti has giu Tia veta da sbatter cun la sanadad e la sanadad da Valerie. Suenter l'operaziun da cancer has Ti survegniu ina schliata comba: «Elefantenebein» senumna quella malsogna. Onns ora has Ti luvrau cun dolurs, mo darar eis Ti selamentaus. Cun Tia laver savevas secumblidar. Era la malsogna da Valerie ch'ha entschiet cun 7 onns ed adina puspei serepetida ha adina mudergiau Tei. Mo Ti has purtau tut cun gronda pazienzia. Contas gadas che Ti has svidau ora Tiu cor a mi e sco jeu savevel devel a Ti buns cussegls. Ti eis adina staus in da bien cor. Cons kilos creflis che Ti has schenghegiau a nus ed ad auters tut ils onns ora! Engrazia.

Anna 1989 cu bab e mumma ein stai morts has Ti surpriu la casa paterna sco casa da vacanzas per vus. Con bugen che Ti eras cheu e seapescha mintg'onn a pesca. In ni 2 pèschs eran adina per mei.

Ils 20-12-2013 hael survegniu in telefon dad Alphonsine. Ti seigies el spital ed ei sappien buca tgei che Ti hagies. Ils 22-12-2013 hael aunc telefonau cun Tei e consolau Tei. Ei vegni segir meglier e sche Dieus vegli che Ti stoppies murir, lu stos Ti buca haver tema. Ti ch'eis staus in aschi bien carstgaun. L'auter di ha ei giu num sch'jeu vegli aunc veser Tei dueigi jeu vegnir. Mes'ura pli tard fuvel el tren sin via tier Tei. Suenter 2 uras viadi vegn il telefon, il Placi ei morts. Massa larmas ein rucladas da mias vestas giu. Daco has buca spitgau sin mei? Quei ei stau la veglia da Diu ed jeu sundel segira e selegrel sin in seveser cun Tei sin l'auter mund.

Da nescher e da murir has Ti fatg immens spert.

Bien pia car frar, stai bein e rauassa en pasch.

Tia sora Barla